

## **Dae su monte a sa marina: in bici dae Lanusè a Tortolì pro promòvere su sardu e s'isport**



Unu percursu totu in betada de unos 25 chilòmetros, dae su coro de su monte ogiastrinu finas a is abbas cristallinas de su mare de Tortolì. Custa est s'esperientzia bìvida sàbadu coladu dae is partetzipantes a sa manifestatzione “Dae su Monte a sa Marina”, organizada dae su Grupu tziclìsticu Ajò in Sardegna Bike Experience ASD, in collaboratzione cun is isportellos linguìsticos de Lanusè, Irbonu, Loceri e Tortolì.

A is 8.30 de mangianu, dae in antis sa crèsia de sartu de Santu Còsomo de Lanusè, si sunt agatados una truma de tziclistas, intre issos ses pipios, ghiados dae s'istrutore Innocenzo “Enzo” Gallozza. Mòvidos a ora de is 9, ant afrontadu in mountain bike su caminu chi, in un'ora e mesu, ddos at fatos lòmperre dae su pranu de Santu Còsomo a s'arenile de Muscì: unu percursu de 25 chilòmetros, chi dae 1000 metros de cuota calat a bellu a bellu finas a livellu de su mare. Sa truma de tziclistas at fatu tapa in Lanusè, in sa pratza de sa Catedrala, e in Loceri, in sa pratza de sa domo comunale.

A s'arribbu, unu meritadu bagnu in is abbas limpidas de sa marina e, a s'ghire, unu momentu de festa cun cosa de papare e de bufare in cumpangia de is pipios e de sos babbos issoro.

S'initiativa, in prus de s'aspetu isportivu e de recreu, at tentu fintzas una valèntzia culturale e linguìstica forte. Durante sa faina, difatis, est istadu promòvidu s'impreu de su sardu veicolare, in lìnìa cun is obietivos de sos isportellos linguìsticos, impinnados a favorire s'usu de sa limba mama in cuntastos fitianos e comunitàrios, in s'isport puru.

«Custu est su cumintzu ebbia», ispiegant is organizadores, annuntziende àteros eventos in programa: de sa “sa chirca de s'iscusòrgiu” in bitzicleta a essidas in bitzicleta intre is nuraghes, ocasiones in ue is pitzocos ant a pòdere fàghere isport a s'abertinu e in su matessi momentu iscobèrrere su patrimoniu archeològicu e culturale de s'Ogiastra.

Dae annos Gallozza, figura de riferimentu pro is giòvanos tziclistas locales, promovet sa passione pro sa bitzicleta, educhende is pitzocos a su respetu de sas règulas de su caminu, de s'ambiente e de su paisàgiu. «Sa bici – ammentat Enzo – est unu trastu de crèschida, de sotzializatzione e de amore pro su territòriu».